

# BILTEN

Mart 2026.  
Godina 1, broj 1

ISLAMSKE ZAJEDNICE BOŠNJAKA U ŠVICARSKOJ

„Uspjeh moj zavisi samo od Allaha; u Njega se uzdam  
i Njemu se obraćam“ (Kur'an, 11:88)

BAJRAM ŠERIF MUBAREK OLSUN



## Impressum

**Bilten Islamske zajednice Bošnjaka u Švicarskoj**

**Glavni urednik: Halim Grabus**

**Za izdavača: Sadudin–ef. Tutnjić i Nihad Hrustić**

**Redakcija: Hfz. Mustafa–ef. Mehić, Ibrahim–ef. Hadžić, Ibrahim–ef. Husanović, Tarik Hašimović, Asim Hodžić, Sahudin Šljivar i Bego Beganović**

**Design: @HalimGrabus**

Sva prava pridržana

Iz arhive IZBCH



## Sadržaj

Uvodna riječ Glavnog urednika	4
U Yverdonu održana Vanredna Skupština IZBCH: Izabrano novo rukovodstvo	5
Podrška novom rukovodstvu Islamske zajednice u Švicarskoj	5
Intervju sa Predsjednikom IZBCH: Islamska zajednica Bošnjaka u Švicarskoj može biti primjer drugim bošnjačkim zajednicama u dijaspori	6
Aktivnosti Predsjednika i Glavnog imama kroz foto objektiv	11
Hafiz Mustafa-ef. Mehić: Želja, plan i rad	18
Bajramski prijem u organizaciji Islamske zajednice Bošnjaka u Švicarskoj	19
Intervju sa Glavnim imamom IZBCH: Naša snaga je u jedinstvu i međusobnom uvažavanju	20
Ibrahim-ef. Hadžić: Važnost zajedništva i zajedničkog djelovanja	25
Doprinos Islamske zajednice promociji istine o genocidu u Srebrenici	26
Virtualni i fizički sastanci Izvršnog odbora	27
Ibrahim-ef. Husanović: Ramazan – škola unutarnje discipline i društvene odgovornosti	28
Regionalni okrugli stolovi u organizaciji Izvršnog	30
Obilježena 30. godišnjica džemata Chur: Oaza mira, zajedništva i dobra	31
Srce u dijaspori, duša u vakufu: Džemat Bern učvrstio zajedništvo za buduće generacije Bošnjaka	33
U Buchsu svečano obilježeno 30 godina Islamskog kulturnog centra Bošnjaka „Dr. Irfan Ljubijankić“	34
U Flawilu održana 13. Večer Kur'ana i ilahija	35
Hatme u džematu Yverdon: tri generacije učača Časnog Kur'ana iz iste porodice	36
Radni sastanak delegacije Izvršnog odbora IZBCH sa džematskim odborom BKC „Bošnjak“	37
Prođoh Bosnom kroz gradove: Stolac, sjajni biser Hercegovine	38

## Uvodna riječ Glavnog urednika

U januaru prošle godine, članovi Izvršnog odbora svjesno su preuzeli odgovornost i emanet vođenja Zajednice uprkos kompleksnoj i nadasve teškoj situaciji u kojoj se s pravom moglo postaviti pitanje o ispravnosti takve odluke. Time su praktično pokazali svoju nepokolebljivu odanost vrijednostima zajedništva i čvrsto ubjeđenje u potrebu očuvanja jedinstva institucije koju su vrijedni aktivisti godinama gradili i snažili. Upravo su snaga njihovog zajedništva i jasna vizija postale ključni faktor uspjeha i pokretač pozitivnih promjena. Naravno, jedinstvo ne znači odsustvo različitih mišljenja, već sposobnost da se različite perspektive usmjere zajedničkom cilju.

U ovom prvom broju Biltena želimo naglasiti upravo tu dimenziju zajedništva i ispričati pozitivnu priču o ljudima koji su interese Zajednice bez oklijevanja stavili u prvi plan i strpljivo radili na vraćanju poljuljanog povjerenja u krovnu instituciju i rukovodstvo. „U vrijeme kada svako u svakoga sumnja“, oni su praktično pokazali da iskrena saradnja gradi povjerenje, jača kapacitete i omogućava da se resursi koriste efikasnije i odgovornije.

Na stranicama koje slijede predstavljamo inicijative, projekte, primjere dobre prakse i ideje koje pokazuju kako iskrena saradnja, utemeljena na principima islamskog bratstva, može donijeti konkretne rezultate. Cilj Izvršnog odbora je da podstaknemo razmjenu iskustava i aktivniju saradnju, ojačamo partnerstva i podsjetimo da su trajne promjene moguće samo kada se djeluje zajedno. U konačnici, jedinstvo kojem Izvršni odbor poziva nije samo vrijednost koju treba zagovarati – ono je i način djelovanja.

Želim vam ugodno čitanje,

*Halim Grabus*

## U Yverdonu održana Vanredna Skupština IZBCH: Izabrano novo rukovodstvo

U prostorijama džemata Yverdon, 18. januara 2025. godine, održana je vanredna Izborna skupština Islamske zajednice Bošnjaka u Švicarskoj. Skupštini je prisustvovalo 79 od ukupno 86 delegata, odnosno predstavnici 24 od ukupno 27 džemata.

Skupština je prihvatila ponuđeni prijedlog dnevnog reda od strane Izvršnog odbora Islamske zajednice:

1. Izbor novog rukovodstva IZBCH;
2. Potvrđivanje Glavnog imama IZBCH od strane Skupštine;
3. Razno.

**Nihad Hrustić** je izabran za novog Predsjednika IZBCH; **Tarik Hašimović** za Potpredsjednika; a **Bego Beganović** za blagajnika.

Članovi Izvršnog odbora iz reda imama su: **Ibrahim-ef. Husanović**, **hfz. Mustafa-ef. Mehić** i **Ibrahim-ef. Hadžić**.

Članovi Izvršnog odbora iz reda civila su: **Halim Grabus**, **Sahudin Šljivar** i **Asim Hodžić**.

U Nadzornu komisiju su izabrani: **Emin Šerifović**, **Fikro Mesić** i **Besim-ef. Hrnjić**.

Delegati skupštine su potvrdili **Sadudin-ef. Tutnjića** za Glavnog imama IZBCH.

**Odluke Skupštine:**

1. **Prijedlog Glavnog imama, Sadudin-ef. Tutnjića, da se finansijsko poslovanje IZBCH u budućnosti uskladi sa švicarskim zakonima: jednoglasno usvojeno.**

2. **Ukidanje nagrade (otpremnine) za imame koji odlaze u penziju: jednoglasno usvojeno.**

3. **Ukidanje radnog mjesta Jasmin-ef. Demića, koordinatora džemata IZBCH: jednoglasno usvojeno.**

## Podrška novom rukovodstvu Islamske zajednice u Švicarskoj

Rijaset Islamske zajednice je na svojoj sjednici održanoj u četvrtak, 23. januara 2025. godine - na temelju dobivenih informacija o aktivnostima koje su u Islamskoj zajednici u Švicarskoj poduzete na prevazilaženju nastalog zastoja u funkcioniranju krovne organizacije - usvojio je sljedeći zaključak:

- Nakon što su iscrpljene sve mogućnosti u saradnji s krovnom organizacijom Islamske zajednice Bošnjaka u Švicarskoj, reisul-ulema je imenovao novog v.d. glavnog imama **Sadudin-ef. Tutnjića**. U Yverdonu je 18. januara ove godine održana Vanredna izborna skupština na kojoj je izabran i novi Izvršni odbor i predsjednik Izvršnog odbora - gospodin **Nihad Hrustić**.

Rijaset daje punu podršku novoizabranom rukovodstvu u vođenju Zajednice, upravljanju aktivnostima u njoj i brizi o rukovođenju Zajednicom u skladu s njenim normativnim aktima i važećem zakonodavstvu države Švicarske. Rijaset se raduje činjenici da predstojeći ramazan dočekujemo u duhu islamskog jedinstva i bratske solidarnosti.

Rijaset pohvaljuje angažman imama, rukovodstva džemata i džematlija u prevazilaženju krize funkcioniranja i s ponosom ističe njihovu visoku svijest o institucionalnom jedinstvu muslimana - navodi se u zaključku.

*(Preporod.info)*

## Intervju

Nihad Hrustić, Predsjednik Islamske zajednice Bošnjaka u Švicarskoj

# Islamska zajednica Bošnjaka u Švicarskoj može biti primjer drugim bošnjačkim zajednicama u dijaspori



Povodom predstojeće izvještajne Skupštine, Predsjednik Islamske zajednice Bošnjaka u Švicarskoj, hadžija Nihad Hrustić u intervjuu za Bilten IZBCH govori o projektima i aktivnostima koje je uspješno implementirao novi Izvršni odbor s ciljem vraćanja i izgradnje povjerenja u instituciju i predstavnike Zajednice. Predsjednik je govorio o trenutnoj situaciji, izazovima i planovima za naredni period kao i viziji uspješne, primjerne i funkcionalne Zajednice.

**Razgovarao: Halim Grabus**

**Uvaženi Predsjedniče, prošla je godina dana otkako si preuzeo emanet vođenja Islamske zajednice Bošnjaka u Švicarskoj. U kakvom stanju se danas nalaze krovna institucija i njeni džemati?**

Dragi Halime dozvoli mi da ti, prije nego odgovorim na ovo pitanje, zahvalim na prilici da budem dio istorije i „govorim“ za prvi Bilten IZBCH. Čestitam ti na ovom lijepom projektu i zahvaljujem ti se na trudu koji si, kao Urednik, uložio da ovo glasilo „ugleda svjetlo dana“.

Ovaj Bilten će obuhvatiti mnoge aktivnosti naše Zajednice iz prošle godine, te će time doprinijeti još većoj transparentnosti kojoj naš Izvršni odbor teži.

Bošnjački džemati u Švicarskoj dobro funkcionišu, imaju svoje stalne aktivnosti koje dosta kvalitetno obavljaju, a uz to su i finansijski stabilni. Pozitivno je da više od polovine naših džemata posjeduje vlastite prostorije, što opet rasterećuje džematske budžete i olakšava finansiranje raznih izdataka koje džemati imaju. Što se izazova tiče, izdvojio bih dva koja su, po mome mišljenju, aktuelna. Kao prvo, sve je teže pronaći volontere koji su spremni hizmetiti

džematu i biti dio džematskog odbora. U rukovodstvima velikog broja džemata, među koje nerijetko spadaju i sami predsjednici džematskih odbora, nalaze se aktivisti koji posljednje dvije decenije vrijedno i nesebično rade za opće dobro, i to ne radi toga što svoje "pozicije" ne žele prepustiti drugima, već uglavnom zbog nedostatka alternative. Drugi izazov sa kojim se džemati suočavaju vezan je za naše imame. Zabrinjavajućeg trenda da imami sve češće napuštaju džemate u dijaspori, nije pošteđena ni naša Zajednica, a proces angažmana novog imama je sve teži i kompleksniji uglavnom zbog administrativnih prepreka ili slabog odziva kandidata na raspisane konkurse. Stoga je pitanje i status imama jedno od gorućih i najvažnijih pitanja kojim se intenzivno moramo baviti. Što se naše Zajednice tiče, usudio bih se kazati da se situacija u značajnoj mjeri "normalizirala" i stabilizirala. Predanim radom članova novog Izvršnog odbora uspješni smo sanirati stanje koje smo zatekli i postaviti dobre temelje na kojima ćemo, uz Božiju pomoć, graditi budućnost IZBCH.

**U proteklom periodu realizirani su značajni projekti i pokrenute važne inicijative. Koji su to najvažniji rezultati Izvršnog odbora koje bi ovom prilikom posebno izdvojio?**

Osim svakodnevnih aktivnosti koje imamo, Izvršni odbor je uložio veliku energiju da bi sačuvao jedinstvo u našoj Zajednici i povratio povjerenje u njene predstavnike i organe. Mislim da smo transparentnim radom i stalnim informisanjem predstavnika džemata o aktivnostima Izvršnog odbora, hvala Allahu, u tome uspjeli. Osim toga, ostvarili smo dobru saradnju sa, za nas bitnim, organizacijama kao što su: džemati, Mreža mladih, Ured Muftije za Zapadnu Evropu, FIDS, Rijaset itd. U prošloj godini, pri IZBCH, osnovan je i "Odjel za brak i porodicu", čime je spektar aktivnosti naše Zajednice dodatno proširen.

Dalje bih izdvojio opširne analize finansijskog i administrativnog poslovanja naše Zajednice za period 2018.–2024. godina, koje su vršile Komisije formirane na inicijativu Izvršnog odbora. U cilju uspostavljanja stalne i dobre komunikacije sa džematima iste smo redovno informisali o našim aktivnostima, a u tom kontekstu smo, u prošloj godini, organizirali tri regionalna "okrugla stola" na kojima smo imame i predsjednike džemata upoznali o radu Izvršnog odbora, te s njima otvorili diskusije o važnim pitanjima vezanim za našu Zajednicu. U 2025. godini, priredili smo Bajramski prijem, a ove godine iftar za predstavnike džemata. Nisam potpuno siguran, ali lahko je moguće da su navedeni skupovi po prvi puta organizovani pod pokroviteljstvom IZBCH. Dalje, pronašli smo "partnera" preko kojeg našim džematlijama omogućavamo odlazak na hadž i umru.

**„Izvršni odbor je uložio veliku energiju da bi sačuvao jedinstvo u našoj Zajednici i povratio povjerenje u njene predstavnike i organe“.**

Posebno mi je drago da ovom prilikom mogu istaknuti da smo pokrenuli proces transfera novca prema Rijasetu Islamske Zajednice u BiH–i, i da smo sva sredstva koja su naši džemati u toku 2025. godine ukupili u akcijama zekata i sadekatul-fitra, kuršana i sergija uspješno prebacili na račun Rijasetu i u Fond Bejtul-mal. Intenzivno smo radili i na pripremi baze podataka naše Zajednice, te na novim aktima IZBCH koje ćemo, ako Bog da, završiti u skorijoj budućnosti.

**Zajednica je prošla kroz veoma težak i turbulentan period. Šta je potrebno uraditi kako bi se sačuvao princip zajedničkog donošenja odluka i spriječila samovolja pojedinaca na vodećim pozicijama?**

Kao prvo, akti naše Zajednice moraju biti decidni po ovom pitanju i jasno regulisati prava i kompetencije funkcija i radnih tijela IZBCH.

Kao drugo, oni koji se prihvate rukovodećih pozicija bilo u džematu, bilo u Zajednici moraju biti svjesni činjenice da timski rad ne trpi samovolju. Pri upravljanju nevladinim organizacijama u čijim odborima su uglavnom volonteri, ja lično pokušavam praktcirati princip kolegijalnosti kao način rukovođenja i sa ovom praksom sam stekao pozitivna iskustva.

**Rad i aktivnosti Islamske zajednice usklađeni su sa važećim zakonima Švicarske i Lihtenštajna, te pravnim aktima Islamske zajednice u Bosni i Hercegovini. Da li IZBCH direktno saraduje sa određenim državnim institucijama kada je riječ o položaju muslimana ili su takva pitanja u nadležnosti FIDS-a?**

Za sada nema takve saradnje. Time se trenutno prvenstveno bavi krovna organizacija svih muslimana u Švicarskoj – FIDS, čiji smo mi članovi i čiji rad finansijski i na druge načine pomažemo. Međutim u budućnosti, dok riješimo neke prioritetnije zadatke, trebamo se pozabaviti i ovom temom, jer nas na to obavezuje i Statut naše Zajednice u kojem, između ostalog, stoji da IZBCH treba zastupati interese svojih članova prema javnosti i švicarskim institucijama, promovisati međureligijski dijalog, raditi na integraciji muslimana, prije svih Bošnjaka, u ovdašnje društvo itd.

**Godinama hizmetiš u različitim organizacijama i ulogama. U čemu nalaziš motivaciju za volonterski rad i kako pronalaziš potrebno slobodno vrijeme?**

Više od 25 godina u kontinuitetu sam aktivan i pokušavam dati određeni doprinos u radu i razvoju bosanskih i bošnjačkih udruženja. Nakon FC Bosna ZH, džemata Cirih i NVO „Glas za Bosnu“, IZBCH je četvrta organizacija na čijem sam čelu. Motivaciju za višedecenijski volonterski rad uvijek iznova pronalazim u hadisu Božijeg Poslanika, a.s., u kojem je kazao da je „najbolji onaj čovjek koji najviše koristi drugim ljudima“. Mislim da slobodno vrijeme koje ulažem u društvenokorisni aktivizam pronalazim ponajviše zbog toga što skoro nikako

nisam prisutan na socijalnim mrežama, i na istima (osim na dva poslovnog karaktera) nemam svoje profile, čije ažuriranje i praćenje aktivnosti umreženih „prijatelja“ mnogim ljudima oduzima puno vremena. Osim toga, duboko sam ubijeđen da Allah, dž.š., daje bereket u vremenu kada se bavimo nečim što je od opće koristi.

**U kakvom se stanju nalaze Bošnjaci u Švicarskoj? Nedostaje li im čega?**

Prema mome mišljenju, Bošnjaci su jako dobro integrisani u Švicarsko društvo. „Naši“ ljudi su vrijedni, poštenu i odgovorni radnici, i kao takvi su prepoznati na tržištu rada. Generacije naše omladine i mladih ljudi koji su rođeni i odrasli u Švicarskoj školuju se na najboljim ovdašnjim univerzitetima i visokim školama, što im omogućava da apliciraju na prestižne pozicije u svjetski-poznatim kompanijama, a čime će se dodatno popravljati status Bošnjaka u sredini u kojoj živimo.



**„Motivaciju za višedecenijski volonterski rad uvijek iznova pronalazim u hadisu Božijeg Poslanika, a.s., u kojem je kazao da je „najbolji onaj čovjek koji najviše koristi drugim ljudima“.**

Nadam se da pripadnici “naše” akademske zajednice neće zaboraviti svoju “bazu” i da će, u sklopu svojih mogućnosti, da(va)ti značajan doprinos boljem i efikasnijem funkcionisanju naših džemata i Zajednice. Mi koji živimo u Švicarskoj posjedujemo potencijal za napredak i razvoj. Radi ilustracije, spomenut ću samo dva segmenta na kojima bi, po meni, trebali ubuduće (po)raditi. Kao prvo nedostaju nam organizacije koje bi se bavile aktivnostima vezanim za kulturu i jezik. Nadam se njihovom skorašnjem osnivanju odnosno omasovljenju jer bi time popravili kvalitet u ovim sektorima, a osim toga rasteretili bi i džemate, koji se nerijetko, u nedostatku spomenutih organizacija, bave aktivnostima koje per se ne spadaju u njihovu nadležnost. A kao drugo, smatram da smo premalo prisutni u ovdašnjoj politici, pa je stoga potrebno raditi na motivisanju mlađih ljudi da se angažuju u političkim strankama i budu kandidati na izborima, kako bi u budućnosti, na svim nivoima vlasti, imali predstavnike koji će se, između ostalog, “boriti” i za interese muslimana.

**Islamska zajednica uskoro obilježava 35. godišnjicu postojanja? To je značajan jubilej i prilika za analizu urađenog kao i onoga što treba uraditi u narednom periodu.**

Tačno. Iduće godine se navršava punih 35 godina od osnivanja Islamske zajednice Bošnjaka u Švicarskoj. U tom kontekstu Izvršni odbor će pokušati pripremiti adekvatnu manifestaciju kojom će se obilježiti ovaj važni jubilej naše Zajednice.

**Nakon Vanredne izborne skupštine u Yverdonu početkom prošle godine, Rijaset je iskazao potpunu podršku novom rukovodstvu IZBCH. Kako bi opisao odnose sa Rijasetom i Uredom Muftije za Zapadnu Evropu?**

Naš odnos sa obje spomenute institucije ocijenio bih kao izuzetno dobar. Sa Upravama Rijaseta Islamske zajednice u domovini od prvog kontakta saradujemo izuzetno kvalitetno i uspostavili smo redovnu komunikaciju. Ovom prilikom moram istaknuti da nas predstavnici Rijaseta tretiraju kao ravnopravnog



*Nihad Hrustić u društvu sa Vehbijom Efendićem, dugogodišnjim aktivistom i prvim Predsjednikom IZBCH*

\*\*\*\*\*

partnera i sagovornika, i da nam daju potrebnu podršku za rad i aktivnosti. Našu saradnju odlikuje međusobno povjerenje, otvorena i iskrena komunikacija, te zajednički rad i djelovanje. U decembru prošle godine naš Glavni imam, Sadudin-ef. Tutnjić, i moja malenkost prisustvovali smo dvodnevnom sastanku članova Rijaseta sa predstavnicima Islamskih zajednica iz Zapadne Evrope u Sarajevu. Na tim susretima smo, između ostalog, diskutovali o temama i izazovima kojima su izložene naše Zajednice i džemati “na Zapadu”. Članovi Rijaseta i naš uvaženi Reisul-ulema, koji je svojim prisustvom pokazao da su mu naše Zajednice, džemati i džematlije iz dijaspore veoma bitni, iskazali su svoju spremnost

da podrže naš rad i aktivnosti. Sa Uredom Muftije za Zapadnu Evropu imamo intenzivnu saradnju i stalnu komunikaciju. Cijenjeni i vrijedni Muftija, Senaid-ef. Kobilica, u relativno kratkom periodu, u nekoliko navrata posjetio je našu Zajednicu i džemate. Činjenica da se primopredaja dužnosti Muftije za Zapadnu Evropu desila u našem džematu Ricken pokazuje, na neki način, status i važnost naše Zajednice pri Uredu Muftije.

### **Kakav je odnos sa Mrežom mladih i da li su nove generacije uključene u procese u Zajednici? Koliko su mladi zainteresirani da se aktivno uključe u rad Izvršnog odbora?**

Jedan od prioriteta IZBCH je saradnja sa Mrežom mladih i podrška njihovih projekata. Iz tog razloga smo, Glavni imam Sadudin-ef., i moja malenkost, često u kontaktu sa rukovodstvom ove organizacije, kako bi bili informisani o njihovim aktivnostima koje, u sklopu svojih mogućnosti, finansijski podržavamo. Mi se redovno odazivamo na njihove centralne iftare, a prošle godine smo ih posjetili na zimskom kampu koji su organizovali. S obzirom da krovna organizacija Mreže mladih ove godine ima Skupštinu, na kojoj će biti izabrano novo rukovodstvo, mi još nismo pokretali pitanje uključivanja predstavnika Mreže mladih u Izvršni odbor ali, kao što ti je poznato, to smo pitanje stavili na agendu naših budućih zadataka i ciljeva.

### **Koje su to najvažnije aktivnosti i planovi koje Izvršni odbor planira realizirati u narednom periodu?**

U 2026. godini planiramo mnoge aktivnosti, ovom prilikom ću spomenuti samo najvažnije. Nastavit ćemo raditi na izgradnji dobre saradnje i pružanju podrške organizacijama koje su za nas važne. Trudit ćemo se da privedemo kraju i rad na novim aktima IZBCH i da iste implementiramo. Osim toga želimo završiti projekat formiranja baze podataka koji smo započeli prošle godine. U pripremi je i nova internet-stranica naše Zajednice, putem koje će naše džematlije, na jednom mjestu, nalaziti informacije o aktivnostima Zajednice i džemata.

U planu je da ove godine organizujemo i jednu dvodnevnu radionicu (workshop) sa imamima i predsjednicima džemata, na kojoj ćemo zajednički skupljati ideje za budući rad, te tražiti rješenja za izazove kojima smo kao Zajednica izloženi. U planu godišnjih aktivnosti predvidjeli smo da se posvetimo i dodatnoj edukaciji i usavršavanju imama i članova džematskih odbora, te da izradimo „Pravilnik o imamima“, sa kojim ćemo pokušati regulisati i popraviti uslove rada i materijalnog statusa imama. U maju ove godine trebao bi nas posjetiti i cijenjeni Reisul-ulema sa svojom delegacijom, pa tu posjetu moramo adekvatno pripremiti. Uglavnom, u narednom periodu planirano je puno aktivnosti. Nadam se da ćemo imati dovoljno energije i resursa da sve isplanirano sprovedemo u djelo.

### **Kakva bi IZBCH trebala izgledati za deset godina?**

Našu Zajednicu dugoročno vidim kao dobro organiziranu, strukturiranu i finansijski stabilnu organizaciju, koja ima jasne ciljeve i programe rada. IZBCH bi trebala biti prepoznatljiva po svojim stalnim i kvalitetnim aktivnostima, jedinstvom, dobrom saradnjom, međusobnim pomaganjem i solidarnošću između džemata i rukovodstva Zajednice. Izvršni odbor je u povodu pripreme predstojeće izvještajne Skupštine IZBCH, pored ciljeva i zadataka koje želimo realizovati u narednim godinama, definisao i viziju naše Zajednice, a koja glasi da IZBCH treba biti najbolja Islamska zajednica u bošnjačkoj dijaspori. Ova vizija, priznat ću, jeste veoma ambiciozna i možda u ovom momentu djeluje nerealna, ali naša Zajednica posjeduje sve potrebne resurse da ta vizija jednog dana bude ostvarena. Nije više pitanje možemo li to ostvariti, već koliko to želimo. Ja sam optimista i ubijeđen sam da ćemo predanim i transparentim radom, jasnom strategijom, nastavkom i razvojem dobre saradnje Izvršnog odbora i naših džemata, u dogledno vrijeme biti primjer drugim bošnjačkim zajednicama u dijaspori.

## Aktivnosti Predsjednika i Glavnog imama kroz foto objektiv

Večer Kur'ana u organizaciji džemata IZBA, Zofingen



„Noć uz GAM“, Rorschacherberg



### Kamp Mreže mladih, Flumerberg



### Iftar Mreže mladih, Schönenwerd



**Iftar u organizaciji FIDS-a, održan u Bernu 11.03.2025., uz prisustvo Bundesrata g. Beata Jansa**



**Sastanak sa Zamjenikom Reisul-uleme, dr. Enesom Ljevakovićem, i Muftijom za Zapadnu Evropu, Senaid ef. Kobilicom, Ricken**



**Sastanak sa predsjednikom FIDS-a, DIGO i predstavnikom Rijasetu IZBiH, Ricken**



**Susret sa Muftijom za Zapadnu Evropu u Cirihu**



**Okrugli sto „Izvrsnost u djelovanju Islamske zajednice BiH“**



**Sastanak sa Reisul-ulemom**



**Posjeta imam u džemata Cirih**



**Posjeta džematu Chur**



### Sastanak Savjeta Glavnog imama u Lucernu



### Uručivanje dekreta Glavnom imamu



### Svečanost džemata Aigle



### Sa programa u džematu Ricken



### Sa hatmi iz Yverdona



## Želja, plan i rad

Piše: Hafiz Mustafa-ef. Mehić

**„Allah neće izmijeniti stanje jednog naroda dok oni ne izmijene ono što je u njima samima.“**

(Kur'an, Er-Ra'd 13:11)

Život svakog čovjeka, ali i svake zajednice, trasiran je trima stvarima koje određuju njihov put i stanje: **željom, planom i radom**. Svi ljudi imaju želje, neki prave planove, ali samo oni koji strpljivo i neumorno rade – stižu do cilja. Želja, zaodjenuta čvrstom odlukom, početak je svake promjene. Jer želja sama po sebi ne mijenja ništa – **odluca mijenja sve**. Vjernik u svom srcu mora osjetiti iskrenu želju da bude bolji: bolji vjernik, bolji roditelj, bolje dijete, bolji komšija, bolji džematlija, bolji član društva. Međutim, sama želja nije dovoljna. Koliko je onih koji kažu: „Želim učiti Kur'an, želim početi klanjati, želim postiti, želim biti iskren, pošten i pravedan, želim učiti u školi“ – ali sve to ostane samo na riječima.

**„O vjernici, bojte se Allaha i neka svaki čovjek pogleda šta je pripremio za sutra.“**

(Kur'an, El-Hašr 59:18)

Vjernik ne živi od želja bez cilja. On razmišlja, planira i uređuje svoj život. Ako želiš naučiti nešto iz vjere – napravi plan kada ćeš učiti. Ako želiš popraviti svoj karakter – razmisli kako ćeš to uraditi. Ako želiš uspjeti u životu – moraš imati plan, red i disciplinu. Bez plana, želja često ostaje samo san.

**„I da je čovjekovo samo ono za što se sam potruđi.“**

(Kur'an, En-Nedžm 53:39)

Rad je ono što razdvaja snove od stvarnosti. Allah voli rad i ustrajnost. Vjera nas uči da učinimo ono što je do nas, a tek onda da se oslonimo na Allaha. Allah otvara vrata uspjeha čovjeku koji radi i koji ne odustaje. To važi za pojedinca, porodicu, zajednicu i državu. Uspjeh ne dolazi slučajno, već kao rezultat **želje, plana i rada**.



Sjetimo se hidžre, Medinske povelje, Bedra i Hendeka – kako je to mudro i odlučno radio naš voljeni Poslanik, alejhi selam. Imajmo želju da budemo bolji ljudi. Napravimo plan kako da napredujemo. Uložimo rad i trud da to ostvarimo. Kada se ove tri stvari udruže, uz iskren nijjet i dovu Svemogućem, dolaze uspjeh, napredak i bereket.

### Poučna priča

Tri prijatelja – Ahmed, Bilal i Hasan – razgovarali su o tome kako da poboljšaju svoj život i život svojih porodica. Ahmed je imao želju da bude uspješan, ali nije pravio planove niti je radio. Samo je govorio: „Želim biti uspješan.“ Bilal je imao planove – zapisivao je šta treba raditi – ali nije ustrajavao. Započinjao bi, ali bi brzo odustajao. Planovi su ostajali na papiru, a ništa se nije mijenjalo nabolje. Hasan je imao i želju i plan, ali je uz to i vrijedno radio. Svaki dan je učio i radio, ustrajno izvršavajući ono što je planirao. Godine su prolazile. Ahmedove želje ostale su samo snovi. Bilalovi planovi su propali zbog nedostatka truda. Hasan je uspio – iskrenom željom, snažnom odlukom, mudrim planiranjem i ustrajnim radom poboljšao je svoj život i život svoje porodice.

## Bajramski prijem u organizaciji Islamske zajednice Bošnjaka u Švicarskoj

U organizaciji Islamske zajednice Bošnjaka u Švicarskoj, u subotu 12. aprila 2025. godine, upriličen je „Bajramski prijem“, kojem su prisustvovali imami, predsjednici i predstavnici džemata, članovi Izvršnog odbora IZBCH, bivši predsjednici zajednice i članovi Nadzorne komisije.

– Ovom prilikom izražavamo zahvalnost svima koji su svojim prisustvom uveličali ovaj skup, a posebno rukovodstvu i vrijednim aktivistima džemata Bern koji je imao ulogu fomačina, na velikodušnom gostoprimstvu i uloženom zahmetu za pripremu ovog prijema – istakli su organizatori.

Ovom prilikom su izrazili riječi nade da će i u budućnosti imati priliku da organizuju slične manifestacije s ciljem saradnje i jačanja Zajednice.

(Preporod.info)



**Islamska zajednica Bošnjaka  
u Švicarskoj**

## Intervju

Sadudin-ef Tutnjić, Glavni imam Islamske zajednice Bošnjaka u Švicarskoj

# Naša snaga je u jedinstvu i međusobnom uvažavanju

Razgovarao: Halim Grabus

Cijenjeni Sadudin-efendija, dekretom Reisul-uleme postavljen si za Glavnog imama Islamske zajednice Bošnjaka u Švicarskoj na mandatni period od četiri godine, počevši od 28. oktobra 2025. U turbulentom periodu tokom 2024. godine, prihvatio si emanet vođenja Zajednice u svojstvu vršioca dužnosti Glavnog imama. Šta je ta odluka značila za tebe i tvoju porodicu u tom bremenitom vremenu?

Kada sam prihvatio dužnost Glavnog imama, bio sam svjestan da Zajednica prolazi kroz izazovan period koji traži smirenost, mudrost i spremnost na dijalog. U takvim trenucima čovjek ne razmišlja samo o funkciji, nego prije svega o emanetu – povjerenju koje treba nositi dostojanstveno i u interesu cijele Zajednice. Za mene lično ta odluka je značila prihvatanje dodatnog tereta odgovornosti, ali i priliku da doprinesem stabilizaciji i jačanju institucija koje su našim ljudima u dijaspori od izuzetne važnosti. Naša Zajednica u Švicarskoj nije samo vjerska institucija; ona je i prostor očuvanja identiteta, jezika, kulture i međusobne solidarnosti među Bošnjacima. Za moju porodicu to je, također, bio veliki izazov. Svaka javna i odgovorna dužnost nužno traži vrijeme, energiju i strpljenje, a porodica je ta koja često nosi dio tog tereta zajedno s vama. Njihova podrška, razumijevanje i sabur bili su mi izuzetno važni. Bez takvog oslonca bilo bi mnogo teže nositi se s obavezama koje ova funkcija podrazumijeva.



## U kakvom je stanju danas Islamska zajednica Bošnjaka u Švicarskoj?

Sa zadovoljstvom mogu konstatovati da je Islamska zajednica Bošnjaka u Švicarskoj danas u stabilnijem i organiziranijem stanju nego što je to bilo u periodu iza nas. Nakon izazova kroz koje je Zajednica prolazila, najvažnije je bilo vratiti povjerenje u institucije, stabilizirati rad organa i osigurati da Zajednica funkcioniše u skladu sa svojim pravilima i misijom. U tom procesu bilo je potrebno mnogo razgovora, strpljenja i spremnosti na saradnju. Danas vidimo da se stvari kreću u dobrom pravcu. Naši džemati širom Švicarske nastavljaju aktivno djelovati i upravo oni predstavljaju temelj života Zajednice. U njima se ne obavljaju samo vjerske aktivnosti, nego se čuva naš identitet, njeguje bosanski jezik, razvija osjećaj pripadnosti i međusobne solidarnosti među Bošnjacima koji žive daleko od domovine. Istovremeno radimo na jačanju institucionalnih kapaciteta Zajednice, boljoj koordinaciji između džemata i krovne organizacije. Smatram da je veoma važno da muslimani budu prepoznati kao odgovoran i konstruktivan dio švicarskog društva.

**Dobri poznavaoци prilika u Zajednici tvrde da se u proteklom periodu uradilo mnogo na vraćanju povjerenja u instituciju i predvodnike. Kako osigurati kontinuitet zajedničkog donošenja odluka i spriječiti eventualnu samovolju pojedinaca na vodećim pozicijama?**

Povjerenje je temelj svake institucije, a posebno vjerske zajednice. Drago mi je da mnogi prepoznaju napore koji su u proteklom periodu uloženi u vraćanje povjerenja u rad Islamske zajednice Bošnjaka u Švicarskoj. Međutim, povjerenje nije nešto što se jednom stekne i zauvijek zadrži – ono se mora stalno potvrđivati kroz transparentan rad, odgovornost i poštivanje institucija. Najvažniji način da se spriječi bilo kakva samovolja jeste dosljedno poštivanje procedura odlučivanja. Naša Zajednica ima jasno definisane organe i pravila djelovanja, i upravo kroz njih se donose odluke koje su od značaja za sve džemate i članove. Kada institucije

funkcionišu kako treba, onda pojedinac, bez obzira na funkciju koju obavlja, ne može niti treba djelovati samostalno mimo tih okvira. Smatram da je također veoma važno njegovati kulturu međusobnog uvažavanja, konsultacija i dijaloga. U islamskoj tradiciji postoji princip šure – savjetovanja – koji nas uči da su najbolje odluke one koje nastaju kroz razgovor, razmjenu mišljenja i zajedničku odgovornost. Samo na taj način možemo osigurati kontinuitet stabilnosti, izbjeći personalizaciju funkcija i graditi Zajednicu koja počiva na institucijama, a ne na pojedincima.

**„Naši džemati širom Švicarske nastavljaju aktivno djelovati i upravo oni predstavljaju temelj života Zajednice. U njima se ne obavljaju samo vjerske aktivnosti, nego se čuva naš identitet, njeguje bosanski jezik, razvija osjećaj pripadnosti i međusobne solidarnosti među Bošnjacima koji žive daleko od domovine“.**

**Kakav je položaj imama u Švicarskoj? Koliko je misija imameta popularna kod svršenika medresa i islamskih fakulteta?**

Položaj imama u okviru Islamske zajednice Bošnjaka u Švicarskoj je specifičan, zahtjevan i veoma važan. Imam u dijaspori ne obavlja samo klasičnu vjersku službu predvođenja namaza i održavanja hutbi; njegova uloga je mnogo šira. On je učitelj, savjetnik, odgajatelj mladih, ali često i most između zajednice i društva u kojem muslimani žive. Imami uživaju veliko poštovanje i povjerenje svojih džematlija. Ljudi im se obraćaju ne samo zbog vjerskih pitanja nego i zbog porodičnih, odgojnih i društvenih izazova s kojima se susreću u dijaspori. Upravo zbog toga odgovornost imamske službe je velika, jer se od imama očekuje znanje, moralni autoritet, ali i sposobnost komunikacije s različitim generacijama. Kada je riječ o interesu

svršenika medresa i islamskih fakulteta za ovu misiju, može se reći da imamet i dalje ima svoju vrijednost i privlačnost, ali istovremeno nosi određene izazove. Život i rad u dijaspori zahtijevaju dodatne kompetencije – poznavanje jezika zemlje u kojoj se djeluje, razumijevanje društvenih kretanja i spremnost na intenzivan rad s ljudima. Naš zadatak kao Zajednice jeste da im omogućimo dobre uslove rada, kontinuiranu edukaciju i institucionalnu podršku, kako bi mogli kvalitetno obavljati svoju misiju i biti istinski vodiči svojim džematima.

**Značajan broj džemata prošle godine obilježio je tridesetogodišnjicu djelovanja. Većina džemata u Švicarskoj riješila je pitanje vlastitih prostorija. Koji su danas najvažniji izazovi kojima su izloženi džemati?**

Prije svega, treba istaći da je činjenica da mnogi džemati obilježavaju trideset godina djelovanja veliki uspjeh i važan znak zrelosti naše zajednice u dijaspori. Tokom tih decenija džematlije su, uz veliki trud i odricanje, uspjele izgraditi džamije i islamske centre, što je ogroman iskorak u razvoju Islamske zajednice Bošnjaka u Švicarskoj. Danas većina džemata ima svoje prostore, što daje stabilnu osnovu za daljnji rad. Međutim, upravo nakon rješavanja infrastrukturnih pitanja dolaze i novi izazovi koji su više sadržajne prirode. Prvi veliki izazov je **rad s mladima i novim generacijama** koje su rođene ili su odrasle u Švicarskoj. Njihov identitet oblikuje se između dvije kulture i zato je važno pronaći načine kako ih povezati s džematom, vjerom i bosanskim jezikom, a istovremeno razumjeti kontekst društva u kojem odrastaju. Drugi izazov je **jačanje odgovornog upravljanja džematima**. Kako džemati rastu i razvijaju se, potrebno je unapređivati organizaciju rada i uključivanje većeg broja članova u džematske aktivnosti. Treći važan izazov je **otvorenost prema društvu u kojem živimo**. Džemati nisu izolirane zajednice; oni su dio švicarskog društva. Zbog toga je važno razvijati saradnju s lokalnim institucijama, učestvovati u međureligijskom dijalogu i doprinositi društvenoj koheziji. U tom smislu, budućnost džemata ne zavisi više samo od zidova koje smo izgradili, nego prije

svoga od sadržaja koje ćemo u tim prostorima razvijati. Uz jačanje institucija, osnaživanje položaja imama, ulaganje u mlade, uvjeren sam da će džemati u okviru Islamske zajednice Bošnjaka u Švicarskoj i u narednim decenijama ostati snažni stubovi našeg vjerskog, kulturnog i društvenog života u Švicarskoj.

**Koje su najvažnije funkcije i aktivnosti Savjeta Glavnog imama? Koje su to najvažnije teme o kojima razgovarate na sastancima?**

Savjet Glavnog imama predstavlja jedno od ključnih tijela za unapređenje vjerskog života unutar Islamske zajednice Bošnjaka u Švicarskoj. Njegova osnovna uloga jeste da kroz zajedničke konsultacije, razmjenu iskustava i stručne prijedloge pomaže u planiranju i usmjeravanju rada imama i džemata širom Švicarske. Na sastancima se razmatraju pitanja koja se tiču organizacije vjerskog života, rada imama, edukativnih programa, kao i načina na koji džemati mogu kvalitetnije odgovoriti na potrebe svojih članova. Takvi susreti omogućavaju imamima da razmijene iskustva i da zajednički traže najbolja rješenja za izazove s kojima se suočavaju. Važan segment rada Savjeta jeste i **planiranje vjerskih aktivnosti tokom godine**, poput organizacije ramazanskih programa, obilježavanja važnih datuma, mektebske nastave, omladinskih aktivnosti i različitih edukativnih projekata. Kroz takvu koordinaciju nastoji se osigurati da aktivnosti u džematima imaju određeni zajednički okvir i kvalitet. Na sastancima se također često razgovara o **pitanjima koja se tiču rada s mladima, porodicom i novim generacijama u dijaspori**. To su teme koje su od izuzetne važnosti, jer upravo od toga zavisi dugoročna vitalnost naših džemata i zajednice u cjelini.


„Uz jačanje institucija, osnaživanje položaja imama, ulaganje u mlade, uvjeren sam da će džemati u okviru Islamske zajednice Bošnjaka u Švicarskoj i u narednim decenijama ostati snažni stubovi našeg vjerskog, kulturnog i društvenog života u Švicarskoj“.

Pored toga, Savjet razmatra i načine na koje Islamska zajednica Bošnjaka u Švicarskoj može konstruktivno doprinositi društvu u kojem djeluje. U suštini, Savjet Glavnog imama je prostor zajedničkog promišljanja i planiranja, gdje se kroz otvoren dijalog nastoji osigurati da rad Zajednice bude usklađen, odgovoran i usmjeren prema dugoročnom razvoju vjerskog života naših ljudi u Švicarskoj.

**Kakvo je stanje sa vjerskom poukom? Koliko djece pohađa mekteb na nivou IZBCH? Ima li slučajeva da se vjerska pouka održava na njemačkom ili francuskom jeziku?**

Mektebska nastava predstavlja jednu od najvažnijih aktivnosti u okviru Islamske zajednica Bošnjaka u Švicarskoj. Upravo kroz mekteb djeca stječu osnovna znanja o vjeri, ali i razvijaju osjećaj pripadnosti svojoj zajednici, kulturi i tradiciji. Možemo reći da postoji stabilan interes roditelja da njihova djeca budu uključena u mektebsku nastavu. To je ohrabrujući pokazatelj da roditelji i dalje prepoznaju važnost vjerskog odgoja i povezanosti djece s džematom. Kada je riječ o jeziku na kojem se izvodi nastava, osnovni jezik mekteba u našim džematima i dalje je bosanski. To je važno ne samo zbog vjerskog obrazovanja nego i zbog očuvanja jezika i identiteta među mladim generacijama u dijaspori. Međutim, svjesni smo da značajan broj djece odrasta u švicarskom društvenom i obrazovnom sistemu, gdje su njemački ili francuski jezik dominantni u svakodnevnoj komunikaciji. Zbog toga u nekim džematima postoje situacije u kojima se određeni dijelovi nastave, pojašnjenja ili komunikacija s djecom djelimično odvijaju na njemačkom ili francuskom jeziku, kako bi sadržaj bio što razumljiviji. U narednom periodu želimo dodatno raditi na unapređenju kvaliteta mektebske

**„Mladi su prisutni u životu naših džemata i učestvuju u različitim aktivnostima, posebno kroz mektebsku nastavu, omladinske susrete, sportske i edukativne programe“.**



nastave, edukaciji muallima i razvoju savremenih nastavnih pristupa, kako bi mekteb bio prostor u kojem djeca rado dolaze, uče i razvijaju zdrav odnos prema vjeri i zajednici.

**U kojoj mjeri su mladi uključeni u aktivnosti džemata? Šta je neophodno učiniti da se omladina snažnije aktivira i podstakne na preuzimanje rukovodećih pozicija u Zajednici?**

Mladi su prisutni u životu naših džemata i učestvuju u različitim aktivnostima, posebno kroz mektebsku nastavu, omladinske susrete, sportske i edukativne programe. U mnogim džematima upravo omladina nosi značajan dio organizacije događaja, humanitarnih akcija i kulturnih programa. To pokazuje da postoji potencijal i želja da budu aktivan dio zajednice. Ipak, moramo biti iskreni i reći da taj potencijal još uvijek nije u potpunosti iskorišten. Jedan od važnih zadataka Islamske zajednice Bošnjaka u Švicarskoj jeste da pronađe načine kako da mlade još snažnije uključi u rad džemata, ne samo kao učesnike programa nego i kao nosioce ideja i projekata.

Prije svega, potrebno je **stvarati prostor za mlade** – prostor u kojem će oni moći iznositi svoje ideje, razvijati projekte i osjećati da su ravnopravan dio zajednice. Mladi ljudi koji su rođeni ili odrastaju u Švicarskoj imaju specifična iskustva i perspektivu koja može biti veoma korisna za razvoj naših džemata. Također, potrebno je razvijati **povjerenje između starijih generacija i omladine**. Iskustvo starijih i energija mladih trebaju se međusobno dopunjavati. Uvjeren sam da će budućnost naše Zajednice u velikoj mjeri zavisiti upravo od toga koliko ćemo uspjeti uključiti mlade ljude u procese odlučivanja i preuzimanja odgovornosti. Ako im damo prostor, podršku i povjerenje, oni mogu postati snažan pokretač razvoja Islamske zajednice Bošnjaka u Švicarskoj u godinama koje dolaze.



**Koje su to najvažnije aktivnosti i planovi koje planirate realizirati u narednom periodu?**

U narednom periodu naš fokus će biti na daljnjem jačanju institucija i unapređenju vjerskog života unutar Zajednice. Naša snaga je u jedinstvu i međusobnom uvažavanju, i vjerujem da samo kroz takav pristup možemo nastaviti razvijati Islamsku zajednicu Bošnjaka u Švicarskoj na dobrobit svih naših džematlija. U suštini, naš cilj je da Zajednica bude stabilna, otvorena i okrenuta budućnosti – mjesto gdje će se ljudi okupljati, učiti, razvijati i osjećati da pripadaju jednoj široj porodici. Smatram da je važno graditi stabilnu i funkcionalnu Zajednicu koja će moći odgovoriti na potrebe naših džemata i članova, ali i biti pouzdan partner društvu u kojem živimo.

Jedan od prioriteta jeste **jačanje mekatebske nastave i rada s mladima**. Djeca i omladina su budućnost naše Zajednice i zato želimo dodatno ulagati u kvalitet vjerske pouke, edukaciju muallima i razvoj savremenih programa koji će mladima biti bliski i razumljivi. Drugi važan pravac djelovanja jeste **institucionalno jačanje i unapređenje saradnje između džemata**. Želimo raditi na boljoj koordinaciji, razmjeni iskustava i zajedničkim projektima koji će povezivati naše džemate širom Švicarske i jačati osjećaj pripadnosti jednoj zajednici. Također, planiramo **nastaviti razvijati saradnju s drugim muslimanskim organizacijama i društvenim institucijama u Švicarskoj**. Smatram da je važno da budemo otvoreni prema društvu, da učestvujemo u međureligijskom dijalogu i da doprinosimo zajedničkom dobru. Posebnu pažnju posvetit ćemo i **edukaciji i stručnom usavršavanju imama**, jer kvalitetan imam je ključ kvalitetnog rada svakog džemata. Želimo omogućiti programe dodatne edukacije, razmjene iskustava i profesionalnog razvoja. Naravno, uz sve to želimo njegovati i **kulturu dijaloga, povjerenja i zajedništva** unutar Zajednice. Naša snaga je u jedinstvu i međusobnom uvažavanju, i vjerujem da samo kroz takav pristup možemo nastaviti razvijati Islamsku zajednicu Bošnjaka u Švicarskoj na dobrobit svih naših džematlija. U suštini, naš cilj je da Zajednica bude stabilna, otvorena i okrenuta budućnosti – mjesto gdje će se ljudi okupljati, učiti, razvijati i osjećati da pripadaju jednoj široj porodici.



## Važnost zajedništva i zajedničkog djelovanja

Piše: Prof. Ibrahim-ef. Hadžić

Čovjek je po svojoj prirodi društveno biće. Ne može se razvijati niti očuvati svoj identitet bez zajednice. Islam je od samog početka gradio vjernike kao zajednicu, ummet u kojoj se pojedinac ne gubi, nego se kroz zajedništvo razvija, jača i pronalazi svoje mjesto. Zato vjera nije samo lični odnos prema Allahu, već i odgovornost prema drugima. Ona se potvrđuje kroz zajedništvo i zajedničko djelovanje.

Kur'anski poziv: ***"I čvrsto se Allahovog užeta držite svi i nikako se ne razjedinjujte!"*** (Ali Imran, 103) jasno ukazuje da je zajedništvo temelj stabilnosti i snage. Islamski učenjaci pojašnjavaju da se pod "Allahovim užetom" podrazumijevaju vjera i Kur'an, ali i zajednica vjernika, džemat. Vjera se ne živi samo individualno, već kroz organiziran i povezan život muslimana. Zajedništvo u islamu nije samo fizičko okupljanje, već povezanost ljudi u dobru, istini i zajedničkom cilju. Kada se vjernici okupe oko Kur'ana i sunneta Poslanika, a.s., njihovo jedinstvo postaje izvor snage, mira i stabilnosti. Poslanik, a.s., opisao je vjernike kao jedno tijelo, kada jedan dio osjeti bol ili potrebu, cijelo tijelo reagira. Time se naglašava da zajednica nije skup pojedinaca, nego organizam koji zajedno živi i djeluje.

Međutim, zajedništvo ne može ostati samo na nivou osjećaja pripadnosti. Ono mora imati svoj praktični izraz kroz zajedničko djelovanje. Kada vjernici zajedno rade, uče i pomažu, zajedništvo postaje stvarna snaga. Aktivno učešće u radu džemata, podrška zajedničkim projektima, briga o mladima, starijima i slabijima te međusobna solidarnost predstavljaju konkretan oblik vjere u svakodnevnom životu. Džemati su mjesta gdje se zajedništvo uči i živi. Oni nisu samo prostori ibadeta, već i škole saradnje, odgovornosti i povjerenja. U džematima se gradi osjećaj pripadnosti i zajedničke brige za opće dobro. Kada se džemat doživljava kao zajednička odgovornost, on postaje snažan centar duhovnog, odgojnog i društvenog života.



**„Aktivno učešće u radu džemata podrška zajedničkim projektima, briga o mladima, starijima i slabijima te međusobna solidarnost predstavljaju konkretan oblik vjere u svakodnevnom životu“.**

U dijaspori, a posebno u Švicarskoj, uloga džemata je još izraženija. Oni su prostori očuvanja vjere, jezika, kulture i identiteta. U njima se porodice povezuju, djeca uče ko su i gdje pripadaju, a odrasli pronalaze podršku i smisao zajedničkog djelovanja. Aktivni džemati jačaju i pojedinca i zajednicu. Odgovornost za izgradnju zajedništva ne pripada samo imamima i džematskim odborima, nego svakom članu zajednice. Snaga džemata ne mjeri se samo brojem ljudi, već spremnošću na saradnju, dijeljenje odgovornosti i zajednički trud. Zajednica raste onoliko koliko su njeni članovi spremni da joj doprinose.

U vremenu individualizma, brzog života i zatvaranja ljudi u vlastite probleme, džemat ostaje prostor gdje se uči kako biti čovjek među ljudima, kako slušati, pomagati, praštati i raditi zajedno, te kako ličnu vjeru pretvoriti u društvenu korist i trajno dobro.

Mladi su posebno važan dio tog procesa. Oni traže pripadnost, smisao i uzor. Kada u džematima vide jedinstvo, otvorenost i saradnju, u njima pronalaze svoje mjesto i svoju budućnost. Zato je važno da džemati budu prostori povjerenja, uvažavanja i aktivnog rada. Različitosti među ljudima ne trebaju biti prepreka zajedništvu, nego prilika za učenje i rast. Zajednička vizija i zajedničko djelovanje čine džemate snažnijim i spremnijim da odgovore na izazove vremena u kojem žive.

Danas, više nego ikada, zajedništvo i zajedničko djelovanje predstavljaju temelj opstanka i razvoja naših džemata. Jedinstvo donosi snagu, a zajednički rad daje trajne rezultate. Svaki pojedinac ima svoje mjesto i svoju ulogu.

Nijedna dobra riječ, nijedan sat uložen u zajednicu i nijedno dobro djelo nije bez vrijednosti. Naši džemati u Švicarskoj imaju potencijal da budu primjer živog, aktivnog i složnog muslimanskog zajedništva.

## Doprinos Islamske zajednice promociji istine o genocidu u Srebrenici


Džemati Nušatel, Iverdon, Lozana i Ženeva materijalno su pomogli izdavanje prijevoda knjige **SREBRENICA MCMXCV**, autora Emira Suljagića, na francuski jezik, u izdanju Izdavačke kuće Vrijeme.

Srebrenica MCMXCV – knjiga koja čuva sjećanje i upozorava. U julu 1995. godine u Srebrenici je ubijeno više od 8.000 ljudi. Bio je to najveći zločin u Evropi poslije Drugog svjetskog rata. Ta tragedija ne smije biti zaboravljena zbog nedučnih žrtava i budućih generacija.

Oni nisu prolazna ideja niti privremeni projekat, nego rezultat dugogodišnjeg truda, žrtve i vizije generacija koje su ovaj put započele prije više od trideset godina. Danas, nakon više od tri decenije djelovanja, stoje kao dokaz da zajedništvo nije teorija, nego stvarnost koja se gradi iz dana u dan.

Naša snaga nije samo u broju, nego u kontinuitetu. Nije samo u objektima, nego u ljudima. Nije samo u organizaciji, nego u duhu zajedništva koji nas povezuje. Ono što je započeto prije trideset godina danas je temelj na kojem gradimo budućnost za generacije koje dolaze. Zajedništvo nas je održalo. Zajedničko djelovanje nas je ojačalo. Džemati su nam dali trajnost. Zajedno smo počeli. Zajedno smo opstali.

**I zato, ako želimo sačuvati vjeru u srcima, snagu u zajednici, identitet u porodici i budućnost u našoj djeci, onda moramo znati da bez zajedništva nema trajnosti, bez zajedničkog djelovanja nema stvarnog uspjeha i da se samo u slozi, povjerenju i međusobnoj podršci gradi zajednica koja će, Allahovom voljom, ostati čvrsta, živa i korisna i nama i generacijama koje dolaze.**



## Virtualni i fizički sastanci Izvršnog odbora

Od preuzimanja dužnosti, Izvršni odbor je održao ukupno sedam (pet virtualnih i dva fizička) radnih sastanaka. S obzirom na situaciju u kojoj se nalazila naša Zajednica, djelovalo se istovremeno na više polja. Radilo se na konstituisanju i organizaciji rada Izvršnog odbora, planu aktivnosti i pripremi budžeta za 2025. godinu, a paralelno s tim nastojala se uspostaviti kvalitetna saradnja sa organizacijama kao što su: džemati, Mreža mladih, Ured Muftije za Zapadnu Evropu, FIDS, Rijaset, banka itd. Osim toga, Izvršni odbor je intenzivno radio na očuvanju jedinstva u našoj Zajednici i povratku povjerenja u Zajednicu i njene organe. Među vremenski najzahtjevnije projekte spadaju opširne analize finansijskog i administrativnog poslovanja IZBCH za period 2018.–2024. godina, koje su vršile Komisije formirane na inicijativu Izvršnog odbora.



## Ramazan – škola unutarnje discipline i društvene odgovornosti

Piše: Prof. Ibrahim-ef. Husanović

Bitka. Borba. Kada čujemo ove riječi, čovjek nekako prvo pomisli na oružane sukobe i ratove. I, kada se slijedom ovih misli prisjećamo prvih bitki i prvih pobjeda, koje su bile sudbonosne i svojevrsne prekretnice u ranoj historiji islama, uočavamo zanimljive činjenice: neke od najznačajnijih pobjeda dogodile su se upravo u mjesecu ramazanu. Među njima su Bitka na Bedru, prva velika pobjeda muslimanske zajednice, zatim Fethu-Mekke (Oslobađanje Mekke), kao i, doduše nešto kasnija, ali ne manje važna Bitka kod Hittina, pobjeda pod vođstvom Salahuddina Ejjubija koja je otvorila put oslobađanju Jerusalema.

Na prvi pogled može se činiti paradoksalno da su se ovako značajni historijski događaji desili u mjesecu posta, kada su vjernici bili izloženi fizičkom odricanju i naporu. Međutim, upravo u toj činjenici zavirujemo u dublji smisao ramazana. Mjesec posta nije samo vrijeme uzdržavanja od hrane i pića, nego prevashodno, period intenzivne duhovne izgradnje, moralne discipline i unutarnje transformacije.

Post razvija samokontrolu i disciplinu, podstiče strpljenje i izdržljivost te produbljuje svijest o razlogu postojanja, ovodunjalučkoga bivstvovanja, i u konačnici svijest o samome Stvoritelju i Bogoslužju – takvaluk. U tom procesu učimo ovladati vlastitim željama i slabostima, čime jačamo unutarnju stabilnost i spremnost na odgovorno djelovanje u društvu – emanet i hilafet. Ramazan tako postaje svojevrsna škola karaktera kojoj je cilj u nama oblikovati temeljne etičke vrline – mekarimel-ahlak.



U tom kontekstu važno je naglasiti, kako nas i uči voljeni Poslanik, da se najvažnija borba ne vodi protiv vanjskog neprijatelja, nego unutar nas samih. Borba protiv vlastitog ega, protiv sklonosti ka oholosti, sebičnosti i moralnoj ravnodušnosti, predstavlja temelj svake druge pobjede. Bez unutarnje discipline i samoprijedora teško je govoriti o trajnom uspjehu, bilo na individualnom, bilo na kolektivnom planu. Istovremeno, ramazan u nama razvija i snažan osjećaj društvene odgovornosti. Iskustvo posta, koje uključuje glad i žeđ, podsjeća nas na stvarnost onih koji se s takvim teškoćama suočavaju svakodnevno.

**„Borba protiv vlastitog ega, protiv sklonosti ka oholosti, sebičnosti i moralnoj ravnodušnosti, predstavlja temelj svake druge pobjede.“**

Ramazan oživljava i kao najljepšu mivu, plodnom kišom rosuljom zalijeva našu empatiju i solidarnost, pa nam u njemu i zekat i vitre, i sadaka i priprema iftara drugom postaču ne bude teret nego posebno duši milo i rasterećujuće djelo. Kao da tada jače čujemo Resulullahovu poruku da „najbolji vjernik je onaj koji je najkorisniji drugim ljudima” i lakše shvatamo da se autentičnost vjere ne ogleda samo u individualnom ibadetu, nego i u aktivnoj brizi za dobrobit drugih.

Put ka, rekli bismo, ovom obliku vjerničke zrelosti vodi upravo kroz iskustvo ramazana. Kroz post, kroz unutarnju borbu protiv vlastitog ega i kroz razvijanje suosjećanja, postepeno izgrađujemo karakter koji je istovremeno discipliniran i društveno osjetljiv, te lakše razlučujemo suštinu od formalnosti.

Historijske pobjede koje su se dogodile u ramazanu stoga nisu samo vojni ili politički događaji; one su simbolsnaga zajednice koja je

izgrađena na duhovnoj disciplini, moralnoj odgovornosti i međusobnoj solidarnosti.

Snaga takve zajednice počinje od pojedinca koji je spreman raditi na sebi i svoje sposobnosti staviti u službu općeg dobra.

U konačnici, ramazan je najbolja škola i najbolje vrijeme za svođenje računa sa samim sobom. Allahov Poslanik veli: “Položite račun sebi prije nego što ga drugima budete polagali i saberite svoja djela prije nego što vam ih drugi budu sabirali” Prava pobjeda ne počinje na bojnopolju, nego u srcu čovjeka. Onaj ko uspije savladati vlastiti ego i razviti osjećaj odgovornosti prema drugima, načinio je prvi i najvažniji korak prema istinskom uspjehu.

Gospodaru, hvala Ti na ramazanu hvalom koje si samo Ti dostojan!



Velika džamija u Ženevi  
Photo by H. Grabus



Džamija u Kamičanima, Kozarac  
Photo by H. Grabus

## Regionalni okrugli stolovi u organizaciji Izvršnog odbora

U toku prošle godine, na inicijativu Izvršnog odbora održana su tri regionalna okrugla stola u Oberentfeldenu, St. Gallenu i Yverdonu, s ciljem informisanja predsjednika i članova džematskih odbora o aktivnostima, projektima i planovima za budućnost. Bila je to odlična prilika za otvoreni razgovor i savjetovanje sa aktivistima naše Zajednice o najvažnijim prioritetima kao i prikupljanje ideja i prijedloga o najefikasnijim načinima djelovanja i jačanja saradnje između krovne institucije i džemata.



## Obilježena 30. godišnjica džemata Chur: Oaza mira, zajedništva i dobra


U prostorijama Islamskog bošnjačkog kulturnog centra – džemata Kur (IBKC – Džemat Chur), u subotu 20. septembra 2025. godine, održan je svečani program i druženje povodom 30. godišnjice postojanja i djelovanja ovog bošnjačkog džemata. Svečanosti je prisustvovao veliki broj džematlija, gostiju i predstavnika Islamske zajednice Bošnjaka u Švicarskoj (IZBCH), na čelu sa predsjednikom Nihadom Hrustićem, i Glavnim imamom prof. Sadudinom ef. Tutnjićem.



U nadahnutom emotivnom obraćanju, imam džemata prof. Ibrahim ef. Hadžić naglasio je važnost zajedništva i uloge džemata u životu njegovih članova: „Ovaj džemat nije samo prostor za molitvu, ovo je naš dom, naše utočište i naša porodica. U njemu već 30 godina zajedno učimo Kur'an, klanjamo, njegujemo vjeru, dijelimo životne trenutke i gradimo povjerenje među ljudima. Kroz sve ove godine dijelili smo radost i tugu, učili našu djecu da vole vjeru i domovinu, pomagali jedni drugima i njegovali osjećaj zajedništva. Džemat je naš dom, mjesto sigurnosti, bratstva i ljubavi, otvoren za svakoga dobronamjernog, i ponosni smo što smo izuzetno dobro integrisani u zajednicu grada Chura i švicarsko društvo. Svi mi koji smo dio ove zajednice, zapravo, čuvari smo tradicije i svjetla vjere koje predajemo budućim generacijama.“



Predsjednik džematskog odbora, Bajazit Sijarić, naglasio je da 30. godišnjica džemata odlična prilika da se prisjetimo svih onih koji su svojim nesebičnim zalaganjem i srcem gradili džemat i zajednicu vjernika. Posebnu zahvalu iskazao je vrijednom i poštovanom imamu Ibrahim-ef. Hadžiću, predsjednicima i članovima džematskih odbora te svim džematlijama, koji su svojim trudom doprinijeli da zajednica bude snažna i živa. Iskazao je nadu da će buduće generacije nastaviti tradiciju i znati čuvati vrijednosti džemata na najbolji način.



U ime Islamske zajednice Bošnjaka u Švicarskoj prisutnima se obratio predsjednik Nihad Hrustić, posebno naglašavajući da je džemat Chur istinski primjer istrajnosti i zajedništva. On je istaknuo da tri decenije rada i predanosti pokazuju koliko vjera i zajednica mogu osnažiti i oplemeniti ljude. Poručio je da se Islamska zajednica ponosi dosadašnjim džematskim rezultatima i iskazao uvjerenje da će džemat Chur u budućnosti biti svjetionik bošnjačke zajednice u Švicarskoj.



Glavni imam prof. Sadudin ef. Tutnjić uputio je čestitke džematu i rukovodstvu: "Ovo nije samo jubilej, već dokaz da džemat živi vjeru kroz odgoj, međusobnu brigu i svakodnevne aktivnosti. Kao Glavni imam, ponosan sam na ovaj džemat i na našeg vrijednog imama Ibrahim-ef. Hadžića, koji predano vodi zajednicu. Molimo Allaha da vas osnaži da nastavite s trudom i da vaš rad ostane trajno dobro koje se prenosi na nove generacije."



Program su uljepšali polaznici mekteba kroz recitale i ilahije. Suze radosnice na licima njihovih roditelja bile su vidljive dok su se prisjećali perioda prije 20–30 godina, kada su i oni sami bili dio sličnih džematskih svečanosti. Taj trenutak podsjetio je sve prisutne na kontinuitet tradicije, ljubav prema vjeri i zajednici te snagu koju pruža osjećaj pripadnosti džematu.



Nakon završetka programa, u prostorijama džematskog restorana priređena je svečana večera, zakuska i druženje za sve prisutne, čime je obilježavanje jubileja završeno u duhu zajedništva, uvažavanja i bratske ljubavi.

Džemat Chur, osnovan 12. februara 1995. godine, zvanično registrovan 23. septembra 1995. godine, tokom 30 godina svoga djelovanja razvijao je brojne vjerske, društvene, obrazovne, kulturne i humanitarne aktivnosti, uključujući razne vidove dijaloga s drugim religijama i vjerskim zajednicama. Džemat posjeduje svoje vlastite prostorije i okuplja 290 porodica i članova.



## Srce u dijaspori, duša u vakufu: Džemat Bern učvrstio zajedništvo za buduće generacije Bošnjaka

Na svečan način obilježena je druga godišnjica otvorenja džematskih prostorija, čime je Džemat Bern potvrdio da su dvije godine koje su iza njih satkane od neizmjerne ljubavi, predanog truda i nepokolebljive vezanosti za vlastiti identitet. Ovaj džemat nije samo adresa. On je živa hronika života bosanskohercegovačke dijaspore. Osnovan je davne 1991. godine, u vremenu kada je matica zemlja prolazila kroz najveća iskušenja, a naši ljudi u tuđini tražili utjehu i sigurno uporište.

Džemat Bern je od tada prošao kroz mnoge bure, ali uz predan rad svojih članova, danas ponosno stoji kao snažno uporište za nekoliko stotina porodica. Poseban ponos, utkan u same zidove, jesu vlastite prostorije. Njihova kupovina i uređenje rezultat su zajedničkog napora, dokaza da kada se srca i ruke udruže, nemoguće postaje dostižno. Ove prostorije nisu samo mjesto za molitvu, već su centar društvenog života – topla luka koja čuva našu vjeru, tradiciju i bosanski duh, prenoseći ih na generacije koje dolaze.

Svaka cigla ovdje kazuje priču o našim vrijednim ljudima, onima koji vjeruju i ne daju da se plamen identiteta ugasi.

Dobri domaćini i vrijedni organizatori su se i ovaj put pobrinuli da svečanost ostane urezana u najljepšem sjećanju svakog musafira. Bila je ovo jedinstvena prilika da se oda počast onima koji su najzaslužniji – plemenitim vakifima. U izuzetno dirljivom činu, uručene su im vakufname, kao skromni znak zahvalnosti onima koji su uložili dio sebe da bi osigurali budućnost. Oni su garant da će buduće generacije uvijek imati mjesto koje će ih čvrsto vezati za vjeru, identitet i tradiciju. Taj čin nije bio samo ceremonija, već iskreno svjedočanstvo da je vjera u zajednicu jača od svake udaljenosti i vremena.

(Amir Saletović/Hayat.ba; 04.11.2025)



## U Buchsu svečano obilježeno 30 godina Islamskog kulturnog centra Bošnjaka „Dr. Irfan Ljubijankić“

**Pod sloganom „30 godina na putu dobra“, Islamski kulturni centar Bošnjaka „Dr. Irfan Ljubijankić“ Buchs SG & Liechtenstein 15 novembra 2025., obilježio je vwoj veliki jubilej, okupivši brojne džematlije iz cijele Švicarske i Austrije**

IKBC „Dr. Irfan Ljubijankić“ osnovan je 1995. godine, a iste godine su otvorene prve prostorije džemata. Iako zajednica djeluje i duže, upravo se trideset godina formalnog, neprekinutog rada obilježava ovim jubilejom. Predsjednik džematskog odbora, Selmir Loznica, istakao je vrijednost zajedničkog puta kroz protekle tri decenije naglašavajući kontinuirani napredak.

– Za ovih trideset godina prešli smo veliki put, napravili smo i pravimo velike korake. Večerašnja manifestacija prilika je da se sjetimo svih onih koji su se svojim trudom i djelovanjem ugradili u temelje ovog džemata ostavljajući neizbrisiv trag i trajno dobro. Mi ako Bog da taj put nastavljamo – poručio je Loznica.

Džemat danas okuplja oko 300 porodica koje su aktivni članovi džemata, a porijeklom su iz Bosne i Hercegovine, Sandžaka i Kosova. U programu svečane akademije nastupili su hafiz Hidajet-ef. Talić, Ammar Đikić, Amer Dervishoski, Šejma Mehić-Svraka i Zejd Svraka, uz prigodan nastup polaznika mektepske pouke.

Ovom prilikom, prigodno predavanje održao je dr. hafiz Mensur-ef. Malkić, direktor Uprave za vjerske poslove Rijaseta Islamske zajednice (IZ) u Bosni i Hercegovini, koji je istakao važnost očuvanja zajednice, identiteta i dobročinstva.

Svečanosti je prisustvovao Sadudin-ef. Tutnjić, glavni imam Islamske zajednice Bošnjaka, koji je prilikom obraćanja ukazao na višestruku

ulogu i značaj džemata, ističući da ovakvu bratsku atmosferu može zračiti samo džemat.

U okviru obilježavanja jubileja upriličena je i svečana večera za zaslužne članove džemata, ljude koji su tokom proteklih godina dali nemjerljiv doprinos rastu i jačanju zajednice. Jedan od njih je i Sahudin Šljivar jedan od osnivača te dugogodišnji član izvršnog odbora Islamske zajednice Bošnjaka u Švicarskoj.

Jedno od najznačajnijih strateških opredjeljenja džemata jeste izgradnja prve bošnjačke džamije u Švicarskoj. Tokom perioda od 2020. do 2023. godine džemat je, kroz niz odluka, kupio objekte i zemljište ukupne površine preko 2.500 m<sup>2</sup>, čime je postavljen temelj dugoročnog vizionarskog projekta.

Posebnu ulogu imaju i članice džemata, koje su svojim radom, humanitarnim akcijama i brigom o zajedničkim prostorijama dale neprocjenjiv doprinos razvoju i očuvanju zajednice.



## U Flawilu održana 13. Večer Kur'ana i ilahija

U Flawilu je 15. novembra 2025., održana predivna 13. Večer Kur'ana i ilahija

U toploj i dirljivoj atmosferi, džemat GHB St. Gallen priredio je još jednu nezaboravnu noć ispunjenu učenjem Kur'ana, ilahijama i osjećajem iskrenog zajedništva.

Prof. Ibrahim-ef. Hadžić učestvovao je u programu kao izaslanik Glavnog imama Islamske zajednice Bošnjaka u Švicarskoj. U svome nadahnutom govoru, naglasio je važnost zajedništva i dobrote, posebno ovdje u Švicarskoj, zemlji znanja, reda, rada, uređenosti i discipline. Podsjetio je da ostanemo vezani za Kur'an koji nas uči znanju, pravednosti, strpljenju, povjerenju i dobroti.

Program su svojim nastupima uljepšali Predsjednik odbora džemata GHB Zahir Halilović, predsjednik IZBCH Nihad Hrustić, Džemil ef. Pašić, hfz. Ahmed ef. Hašić, te izvođači ilahija Šaha Isaković-Jelalić i Ibrahim Bilčević, uz vješto moderiranje Salema ef. Hurića.

Na kraju programa prisutnima se obratio prof. dr. Almir Fatić, koji je svojim izlaganjem ostavio snažan trag u srcima svih prisutnih, riječima koje su grijale, hrabrile i podsjetile na neprocjenjivu vrijednost Kur'ana u našem svakodnevnom životu.



**ISLAMSKA ZAJEDNICA  
BOŠNJAKA U ŠVICARSKOJ**  
*Islamische Gemeinschaft  
der Bosniaken in der Schweiz*

## Hatme u džematu Yverdon: tri generacije učača Časnog Kur'ana iz iste porodice

17. januar 2026. biće upisan krupnim slovima u bogatoj historiji džemata

17. januar 2026. godine, za mnoge je bila obična subota, ali za Bošnjake u gradu Yverdon les Bains bio je veliki dan. Naime, toga dana su Ahmetović Amira, Ahmetović Hamza, Čohadarević Zijo, Čohadarević Mirzeta, Demirović Amina, Husić Sabra, Husić Remzija, Hrnjić Beriz, Ikanović Zemina, Kadrić Avdulah, Muminović Aida, Nukić Rijad, Osmanović Naza, Salihović Džana, Softić Suvada, Softić Edis, Softić Amir i Softić Hamza činili svoju prvu hatmu i, sa svojim imamom prof. Besim-ef. Hrnjićem, dočekali, jedan od najljepših dana u njihovim životima.

Besim-ef. je prvo predstavio sve kandidate i o svakom ponaosob rekao nekoliko riječi, a kao kuriozitet, naveo je da u ovoj generaciji „hatmaša“ po prvi put imaju tri generacije iz iste porodice. Nakon toga pristupilo se samim ispitima. Tri godine učenja, truda i velikih odricanja ovu lijepu i interesantnu grupu u kojoj je najmlađi Hamza rođen 2016. godine, a najstarija Zemina 1962., urodili su plodom i još jednom pokazali da ljubav prema Kur'anu i Kerimu ne poznaje granice i godine.



Pred velikim brojem džematlija, rodbine i prijatelja, a pred komisijom koju su činili Ibrahim-ef. Husanović, Ejub-ef. Tulić i Besim-ef. Hrnjić polaznici su pokazali visok stepen znanja prilikom učenja Kur'ana gledajući, zavidno poznavanje tedžvidskih pravila, učenja Kur'ana napamet, kao i opće znanje o našoj lijepoj vjeri. Na kraju programa pogolemu i veoma edukativnu recitaciju izveo je hadžija Avdo Kadrić. Skupu se obratio i prof. Ejub-ef. Tulić, imam džemata Ženeva, koji je pohvalio polaznike i čestitao im na ovom velikom uspjehu. U svojstvu izaslanika Glavnog imama Islamske Zajednice Bošnjaka u Švicarskoj, prof. Ibrahim-ef. Husanović također je čestitao na uspjehu polaznicima i posebno njihovom muallimu Besim-ef., koji je svojim dugogodišnjim radom i uspjesima uzor mnogim kolegama i pravi reprezent jedne od najboljih generacija Gazijine Medrese (84–88).

U veoma nadahnutom predavanju Ibrahim-ef. Husanović je u svjetlu poruka Mi'radža i nadolazećeg mjeseca Ramazana posebno istakao važnost Allahove Knjige u našim životima kao putokazu, namazu kao utočištu, džematu i našoj Islamskoj zajednici kao snazi i zaštiti u ovim veoma izazovnim i turbulentnim vremenima, Nakon dove uslijedila je dodjela diploma, vrijednih poklona, čestitanja prisutnih i zajednički ručak. Dan koji će kao inspiracija svim prisutnima dugo ostati u pamćenju, a našim vrijednim hatmašima nezaboravan. Mubarek olsun!

## Radni sastanak delegacije Izvršnog odbora IZBCH sa džematskim odborom BKC „Bošnjak“

Tokom sastanka predstavljene su aktivnosti džemata Biel i razgovaralo se o situaciji u Islamskoj zajednici Bošnjaka Švicarske

U nedjelju 15. marta 2026. godine, delegacija Izvršnog odbora Islamske zajednice Bošnjaka u Švicarskoj na čelu sa predsjednikom Nihadom Hrustićem, posjetila je džemat Biel i tom prilikom održala konstruktivan radni sastanak sa Izvršnim odborom BKC „Bošnjak“. Delegaciju je poslao Osmo-ef. Mustafić. Sastanku su prisustvovali članovi BKC: Ferid Dautović, predsjednik; Samir Merdanović, sekretar; Halil Plančić, blagajnik; Almin Prošić, savjetnik; Mirhad Žerić, savjetnik; i Asmir Dervišević, savjetnik.

Na početku sastanka, domaćini su predstavili historijat džemata i neke od najvažnijih aktivnosti.

Džemat trenutno ima 172 člana, a mektebsku nastavu pohađa 89 djece. Delegacija Izvršnog odbora IZBCH pohvalila je aktivnosti i rad rukovodstva džemata i izazila želju da se njihova pozitivna iskustva i ideje podijele sa drugim džematima.

Tokom susreta, u otvorenoj i bratskoj atmosferi, razgovaralo se o brojnim pitanjima u vezi funkcionisanja Zajednice, turbulentnom periodu kroz koji je IZBCH prošla, rukovodstvu i određenim nedoumicama, skupljanju i načinu raspodjele zekata i očekivanjima od novog Izvršnog odbora. Istaknuta je važnost redovne komunikacije i savjetovanja.



## Prođoh Bosnom kroz gradove: Stolac, sjajni biser Hercegovine

**Stolac je grad na jugu Bosne i Hercegovine smješten u bogatom mediteranskom ambijentu**

Stolac obiluje bogatim kulturnim naslijeđem, koje je još 1980. godine bilo upisano kao „grad muzej“ pod zaštitu UNESCO-a. Tokom duge historije, na teritoriji Stoca, ali i cijele Hercegovine, preplitale su se i ostavljale traga mnoge i različite kulture i civilizacije.

Stolac nije samo prepoznatljiv po tradicionalnoj hercegovačkoj arhitekturi, ambijentu koji je upotpunjen mnoštvom zelenila i kulturno-historijskim naslijeđem, nego i modro-zelenom rijekom Bregavom, njenim brojnim rukavcima i slapovima, te ljudima koji su ovaj grad činili takvim kakav jeste i upotpunili ga svojim duhom i ljubavi prema zavičaju.

U stolačkom kraju klima je mediteranska sa srednjom godišnjom temperaturom zraka iznad 7°C. Sunčanih dana u Stocu nikada ne fali, ovaj prirodni dragulj ima, pored jadranskog otoka Hvara, najviše sunčanih dana u godini, tj. grad je sa značajno malim brojem kišnih dana tokom godine.

Ambijent koji je jedinstven za Stolac upotpunjava vodopad Provalije, najveći vodopad u Stocu, „Stolačka Nijagara“ koja tokom ljeta zbog niskog vodostaja rijeke Bregave presuši pa je posjeta vodopadu najbolja u jesen, tokom proljeća ili ranog ljeta kada je u svom potpunom izdanju.

Hercegovačka kuhinja jedan je od glavnih aduta ovog kraja, a obilje okusa i domaći kvalitetni proizvodi sigurno će zadovoljiti svačije nepce. Šetajući ovim područjem naići ćete na bogatu riznicu proizvoda koju je stvorila sama priroda. Očarat će vas miris smilja, kadulje, mente, lavande, dok je stolački med nadaleko poznat. Stanovništvo ovog kraja oduvijek se bavilo poljoprivredom, a mediteranska klima, plodno tlo, kao i obilje sunca,

pogoduje uzgoju smokve, šipka, grožđa, maslina, agruma pa i japanske jabuke – kaki.

Islamska kultura i civilizacija na ovom prostoru, svojom arhitekturom i skladnim uklapanjem s prirodom, ostavili su tragove kroz džamije, stare kuće, čaršije, mlinice, kule i druge objekte. Malo je gradova s toliko kulturnih spomenika: paleolitski crtež u pećini Badanj, neolitsko naselje Čairi, ilirski grad Daorson, rimski grad Diluntum, slavenska naselja, nekropole sa stećcima, čovjekov trag od davnina na ovim prostorima... Spisak nacionalnih spomenika Bosne i Hercegovine na području općine Stolac broji čak 30 spomenika, a lokalitet Radimlje sa stećcima te nekropola stećaka Boljuni su uvršteni i na UNESCO listu svjetske baštine.

Stolac je kolijevka mnogih intelektualaca, doktora i istraživača, a pjesnicima i umjetnicima sa svojom rijekom Bregavom i prirodnim ambijentom oduvijek je bio nepresušni izvor inspiracije. Makova Hiža je nezaobilazno mjesto u Stocu. ([odmoriubih.ba](http://odmoriubih.ba); [stolacx.ba](http://stolacx.ba); Al Jazeera)





“Život na ovom svijetu sličan je bilju zemaljskom na koje Mi spustimo s neba kišu s kojim se ona izmiješa, kojim se onda hrane ljudi i stoka. Pa kad se Zemlja ukrasi svojim ruhom i okiti, i kad stanovnici njezini pomisle da su oni toga gospodari, dođe zapovijed Naša, noću ili danju, i Mi to pokosimo kao da prije ničega nije ni bilo. Eto tako Mi potanko izlažemo dokaze narodu koji hoće da razmisli“. (Kur'an, 10:24)

